

王

會

篇

箋

釋

王會篇箋釋卷中

光澤何秋濤願

正北方義渠以茲白茲白者若白馬鋸牙食

孔氏曰亦在臺北與大塵相對義渠西戎國茲白一名駁王氏補注曰西羌傳涇北有義渠之戎地理志北地郡義渠道秦縣也括地志寧原慶三州秦北地郡戰國爲義渠戎國之地爾雅駮如馬倨牙食虎豹山海經中曲山有獸如馬而身黑三尾一角虎牙爪音如鼓名曰駮食虎豹可以禦兵博物志茲白狀如酋耳尾長參其身食虎豹

王氏自注說苑師曠曰駮之狀有似駮馬

秋濤曰自此義渠以下至奇幹凡二十國皆在西方

故列於西皆東嚮其序自北而南義渠西北之國列於其首故言正北方以明之孔氏注云亦在臺北與大塵相對者稷慎以下二十國皆東方之國列於東方西嚮以稷慎爲首最在於北與此義渠正相對也義渠故城在今甘肅慶陽府甯州西北蓋其國都也若其所轄之地則甚廣遠今慶陽府唐慶州及平涼府所屬之固原州唐原州皆義渠舊壤史記秦本紀厲共公三十三年伐義渠虜其王躁公十三年義渠來伐至渭南惠文君十一年縣義渠義渠君爲臣十四年更爲元年十年伐取義渠二十五城匈奴傳秦昭王時宣太后詐殺義渠戎王遂伐滅義渠於是秦有隴

西北地上郡按北地今慶陽府古西戎地周先公不
窋居之春秋戰國爲義渠地至隴西今狄道州先屬
戎上郡今綏德州先屬魏與戎界連故必滅義渠方
能有之又按周書史記解昔者義渠氏有兩子異母
皆重君疾大臣分黨而爭義渠氏以亡按孔晁注以
史記解爲穆王之言則義渠之亡蓋在周成王以後
穆王以前厥後春秋戰國時又有義渠者蓋亡後復
興若陳蔡之比也墨子云秦之西有儀渠之國儀渠
卽義渠古字通也又按孔知茲白卽駁者蓋以爾雅
所說駁與此茲白形狀皆同也山海經說駁凡兩見
海外北經云北海內有獸焉其名曰駁狀如白馬鋸

牙食虎豹說與爾雅同又西山經中曲之山有獸焉其狀如馬而白身黑尾一角虎牙爪音如鼓音其名曰駮是食虎豹郭注曰爾雅說駮不道有角及虎爪是郭意以海外北經所言爲爾雅之駮疑西山經所言之駮別是一物然郭注爾雅引山海經云有獸名駮如白馬黑尾倨牙音如鼓食虎豹則又兼兩說而參合之劉達注吳都賦引山海經亦云駮如馬白身黑尾一角鋸牙虎爪音如鼓能食虎豹也亦并引海外北經西山經之文舊說相承當必有據知古人之言互有詳略不足致疑管子小問篇云桓公乘馬虎望見之而伏桓公問管仲對曰意者君乘駮馬而泝

古盤桓迎日而馳乎公曰然管仲對曰此駁象也駁

食虎豹故虎疑焉說苑又云豹食駁駁食虎駁之狀有似駁馬二書所說並與山海經爾雅合駁亦作駮易說卦傳云乾爲駮馬王虞云駮馬能食虎豹取其至健也孔疏云有牙如鋸能食虎豹蓋由其剛堅外著負力至健故易取象焉詩秦風隰有六駮毛傳引爾雅之駮爲釋蓋此獸見於易詩列於釋畜古人常見之物不以爲異也一切經音義引魏黃初三年六駮再見於野北齊書循吏傳張華原遷兗州刺史先是州境數有猛獸爲暴自華原臨州忽有六駮食之咸以化感所致二書言六駮皆用毛詩義郝氏懿行

曰駮爲名六爲數二書俱將六駮爲名失之誣矣秋
濤按茲白卽駮似馬酋耳卽騶虞似虎諸書所載甚
明博物志言茲白之形與酋耳同濶二獸爲一非也
浚儀引以爲說故附辨之

央

本注一
作英

林以酋耳酋耳者身若虎豹尾長

一本作尾
長三尺其

是身非

參其身食虎豹

秋濤按央林一作史林又
一作夾林酋耳一作尊耳

孔氏曰央林

一本作
央林

戎之在西南者王氏補注曰山

海經林氏國有珍獸大若虎五彩畢具尾長於身名

曰騶吾乘之日行千里注六韜云紂囚文王閼天之

徒詣林氏國求得此獸獻之紂大說乃釋之吾宜作

虞

王氏自注劉芳詩
義疏騶虞或作吾

書大傳散宜生之於陵氏取怪

獸大不辟虎狼閒尾倍其長名曰虞注閒大也虞蓋騶虞也周書曰英林酋耳於陵英林音相邇其是乎淮南子散宜生得騶虞雞斯之乘

秋濤曰央林亦作英林與鄭康成所見本合卽於陵也或本作夾林史林皆字形之譌耳海內北經六韜皆作林氏國周書史記解云昔有林氏召離戎之君而朝之至而不禮留而弗親離戎逃而去之林氏誅之天下叛林氏卽此國也薛綜注文選左思賦以林氏爲山名非是諸書不言其國所在秋濤按央林當卽春秋時之械林央與於於與械皆一聲之轉蓋央林國滅後地入于秦爲械林地也左傳襄十四年諸侯之大夫伐秦濟涇

而次鄭司馬子矯帥師以進師皆從之至于械林杜
注械林秦地不言所在或曰械林卽舊鄭咸林也在
今陝西直隸華州境江氏承顧氏棟高皆從之今按
左傳言濟涇之後師至械林史記秦本紀亦言晉悼
公敗秦軍秦軍走晉兵追之遂渡涇至械林而還是
械林地在今涇水之西明甚攷涇水出今平涼府平涼
縣西東北流逕其縣北又東逕華亭縣東北又東逕
涇州北又東逕長武縣北又東逕邠州北又東南逕
涇化縣西又南逕永壽縣東又南逕醴泉縣東又東
南逕涇陽縣南又東南逕高陵縣西南入于渭按涇
水入渭之處東距華州尙二百餘里是華州境內並

無涇水安得有械林且諸侯之師旣已渡涇而西斷
無忽又東至華州之理下文載樂廩馬首欲東乃歸
則前此渡涇以後皆向西行不向東歸可知此亦足
爲旁證若華州則遠在渭南雖東歸之師亦不經由
其地無論濟涇之師矣然則械林究當在何地曰欲
知械林之所在當先知諸侯涉涇之所在胡朏明云
涇水在今涇陽縣南七里左傳成十三年晉師及秦
戰于麻隧秦師敗績晉師濟涇及侯麗而還襄十四
年晉帥諸侯之師伐秦濟涇而次秦人毒涇上流師
人多死卽此水也按劉伯莊云侯麗在涇陽縣境按
氏說最古最確或以侯麗爲卽然則械林亦當在今

臨潼縣之驪戎國是爲大謬

然則械林亦當在今

涇陽縣西境揆之當日行軍道里正爲密合王會央
林與義渠相次涇陽地北距甯州亦不甚遠周書所
稱林氏離戎蓋亦壤接之國離戎卽春秋之驪戎在
今臨潼縣東二十四里與涇陽相距尤近皆可互證
是央林於陵棧林林氏皆爲一地矣又按毛詩傳騶
虞義獸也白虎黑文不食生物正義引鄭志張逸問
傳曰白虎黑文又禮記曰樂官備何謂答曰白虎黑
文周史王會云曲阜孔叢伯廣林以王會無騶虞疑
今本之脫按山海經海內北經林氏國有珍獸大若
虎五彩畢具尾長於身名曰騶吾乘之曰行千里郭
璞注引周書曰夾林酋耳酋耳若虎尾參於身食虎

豹大傳謂之侄獸吾宜作虞也臧氏庸曰酋耳卽騶
虞酋與騶聲相近段氏六書音均表酋聲第三部騶
聲第四部畢校山海經依俗本周書改爲尊非是莊
氏葆琛曰耳當爲牙牙卽吾字秋濤按耳與牙隸字
極相似因而致誤毛鄭所見本必皆作酋牙今大傳
注作酋耳蓋後人轉依誤本周書改之非其舊也又
按今本王會多誤衍之文以諸書參校應作酋牙者
若白虎黑文尾參於身食虎豹爲是毛傳白虎上疑
奪若字蓋旣云騶虞義獸也而復云白虎如無若字
則文意煩複矣王會紀茲白云若白馬句法正與此
同又今本王會無黑文盧抱經學士以爲脫此二字

是也又按周官鐘師鄭康成注鄭司農云騶虞聖獸
賈疏曰按異義今詩韓魯說騶虞天子掌鳥獸官古
毛詩說騶虞義獸白虎黑文食自死之肉不食生物
人君有至信之德則應之周南終麟趾召南終騶虞
俱稱嗟歎之是麟與騶虞皆獸名謹按古山海經鄒
書云騶虞獸說與毛詩同是其聖獸也秋濤按鄒書
卽周書鄒周音近而誤許君蓋引王會篇爲說鄭無
駁且引以注周禮則義與許同也其作鄭志答張逸
問直引周史王會爲說尤顯然可證近人有引儀禮鄭注謂鄭射禮鄭注謂鄭射禮鄭注謂鄭射禮鄭注謂鄭射禮
鄭注禮則從韓魯說答志則從毛說者及禮記射義云騶虞樂官備也鄭注騶虞毛詩篇名樂官備者謂騶虞曰壹發五犯喻賢者多也于嗟乎騶虞歎仁人也正義曰以犯喻賢也謂一發而得五犯猶若君

一求而得五賢以騶虞不食生物故云于嗟乎其仁人又儀禮鄉射禮鄭注騶虞國風召南之詩篇也射義曰騶虞者樂官備也其詩有一發五狝五發于嗟騶虞之言樂得賢者眾多歎思至仁之人以充其官又鄭志張逸問禮記曰樂官備何謂答曰備者取其一發五狝犯言多賢也合觀三書之說鄭意皆同其解騶虞並用毛說解樂官備則以五狝五縱為言未嘗以騶虞為官名是鄭注禮亦不從韓魯所云鄭有二說者失於疑古本王會食虎豹下當有不食生物之未詳考也

文今本奪去也或云既食自死之肉則食虎豹三字當因上文茲白鋸牙食虎豹而誤衍此臧氏不知騶虞性仁惡殺故于虎豹之嗜殺者則食之合乎殺以止殺之義故謂之義獸攷郭景純所引已有此三字其非誤衍甚明矣藝文類聚引景純騶虞讚云怪獸五彩尾參於身矯足千里儻忽若神是謂騶虞詩歎

其仁

北唐本注一有戎字以閭閻似隃冠一本作閭以隃冠

孔氏曰北唐戎之在西北者射禮以閭象爲射器王

氏補注曰山海經縣雍王氏自注今在晉陽縣西秋濤

按山在今山西太原府太原縣西南十里其上多玉其獸多閭注閭卽羴

也似驢而歧蹄角如靈羊一名山驢輝諸之山其獸

多閭荆山多閭女几之山多閭風雨之山多閭鄉射

禮於郊則閭中注閭獸名如驢一角或曰如驢歧蹄

北唐卽晉陽也詩晉謂之唐傳曰晉居深山戎狄之

與鄰

秋濤曰前已有唐叔而此復云北唐或疑非晉陽地

按左傳定四年子魚曰命以唐誥而封于夏虛啟以夏政疆以戎索是唐之封本在戎境叔虞旣因故國爲唐侯其北之戎國亦自名爲北唐如今之哈密旣有鎮守大臣又自有哈密國王正其比也下文樓煩之戎其地亦與晉陽相近可爲互證蓋此戎地在唐國之北故命曰北唐爾今山西太原府所屬之太原縣治在府西南四十里卽古唐國北唐當在其北與樓煩相接矣爾雅釋畜邢疏引竹書紀年曰北唐之君來見驪馬是生綠耳今本紀年云周穆王八年北唐來賓獻一驪馬是生綠耳然則北唐地出良馬所謂冀之北土馬所生者也成王時貢閭者閭亦馬屬

也儀禮鄭注引周書北唐作北堂堂唐古字通用山海經所載諸山多閭者甚眾按閭卽驢之異文說文驢似馬長耳驢驢子也段氏曰驢驪駃騠駒駼驪驪太史公皆謂爲匈奴奇畜本中國所不用故字皆不見經傳蓋秦人造之耳今按說文肉部羸詁名段氏云蓋羸之古字羸可畜于家則謂之畜宜也是羸之爲物見于上古故製字如羸羸羸羸之屬皆从羸有羸則有驢不得謂爲秦人所製也況諸字多見於爾雅乎安邱王大令筠說文句讀曰爾雅釋獸雖有驢字而非主言驢竊疑王會解之北唐以閭卽此物也周成王初得之以爲異物故大射禮有閭中鄭注曰

如驢一角或曰如驢歧蹄者後來蕃息遂有專字作驢反疑閭爲異物也秋濤按萊友以閭卽驢字說極是惟王會所紀不必異物若長沙鼈禽人菅之類遠方來獻則記之非皆中國所無也伏讀

御批

通鑑輯覽有曰驢父馬母而生騾騾非塞外所有以驢非塞外所有也今騾至塞外率多倒斃而馬則塞外之良產古之匈奴卽今之蒙古單于不乘馬而乘騾乃必無之事以是知史謂驢騾爲匈奴奇畜者蓋雖畜之而不能多故謂之奇畜與上文多馬牛羊爲對文非謂中原無驢騾也山海經載懸瓊山多閭正在北唐境內北唐之貢閭以其所有爲貢不足異而

此次所貢之閭有角似羊異于常閭故又特記之曰閭似踰冠若長沙所貢之鼈與中國所有者無異則不別言其形狀矣此古人屬詞之法也成王既得有角之閭而大射儀因作其象爲射器以示服遠之義後人泥於閭中之形遂分閭驢爲二物耳初學記引廣志云驢羊似驢蓋別有此一種介在驢與羊之間者後世目爲驢羊古人則但謂之閭卽王會所載是已踰冠者郝氏懿行曰踰疑踰字之譌爾雅夏羊牡踰牝殺是也按踰冠蓋卽指解國之羊皮冠上戴其角與閭之戴角同形故舉以爲譬喻也或曰此文閭似踰下本無冠字涉上文解踰冠而誤衍彼言解國

獻羊皮冠當有冠字此言閭有角似獬義無取於冠不當言獬冠也攷郭注山海經閭卽獬也卽字乃似字之譌蓋郭引王會以說山海經之閭其時王會之獬尙未譌爲獬獬下亦無冠字足證今本之舛誤矣說亦近是爰附著之

渠叟以鼪犬鼪犬者露犬也能飛食虎豹

一本作鼪犬考證詳後

孔氏曰渠叟西戎之別名也王氏補注曰禹貢渠搜地理志朔方

王氏自注今夏州

有渠搜縣水經河自朔方東

轉經渠搜縣故城北西域圖記鉢汗國在蔥嶺之西五百餘里古之渠搜國山海經馬成之山有獸如白犬而黑頭見人則飛露犬蓋此類鼪權俱切

王氏自注一作

斲之
若切

秋濤曰按渠搜國見於禹貢搜漢書作叟與王會同
顏師古云叟讀曰搜是也傅氏寅云陸氏曰漢志朔
方郡有渠搜縣武紀云北發渠搜是也以余考之漢
朔方之渠搜非此所謂渠搜此亦當是金城以西之
戎也後世種落遷徙故漢有居朔方者若禹時渠搜
居朔方則不應浮積石陸說非也胡氏渭云按水經
河水自朔方東轉逕渠搜縣故城北注云禮三朝記
曰北發渠搜南撫交阯此以北對南禹貢之所云析
支渠搜矣誤始道元陸氏因之渠搜與交阯對舉則
不在朔方可知龜茲

音邱
慈

王國治去長安七千四百

八十里而上郡有龜茲縣師古曰龜茲國人來降附者處之於此故以名云朔方之渠搜亦此類也涼土異物志曰古渠搜國在大宛北界隋書西域傳曰鑠汗國都蔥嶺之西五百餘里古渠搜國也本裴矩西域圖記渠搜之在西域有明徵矣據漢書大宛北與康居接並在蔥嶺西而異物志言渠搜在大宛北界豈漢時康居部落卽古渠搜之地歟或曰鑠汗在蔥嶺之西以爲渠搜毋乃太遠曰奚有於是條支國臨西海去玉門陽關四萬餘里漢時猶且來獻今鑠汗國都去長安不過一萬二千二百五十餘里浮河而下至平陽則視長安又差近何言太遠也

西域傳云康居國王治去長安萬二

千三百里大宛國王治去長安萬二千五百五十里
古渠搜在大宛北界道里當略同又水經注引西河
舊事曰蔥嶺在敦煌西八千里通典云燉煌郡去西
京三千七百五十五里并蔥嶺西五百餘里計之則
燉汗去長安一萬二千二百五十餘里恰與
康居里數相符其爲古渠搜國又何疑焉 秋濤按

今伊犁西北哈薩克諸部落卽古渠叟地歲時朝貢
比於侯甸蓋 聖朝之德教遠矣大戴記孔子對

哀公稱虞舜夏禹成湯文王之德皆云通於四海海
之外肅慎北發渠搜氏羌來服蓋渠搜爲西方甚遠
之國故舉以明德化之極致也戴氏震水地記曰河
源已南唐吐蕃今西藏之境古崑崙國在焉積石已
東北今青海之境古析支在焉漢通大宛西域踰蔥
嶺而西古渠搜在焉三地大小諸國通稱西戎繫于

雍州形勢蓋可得而詳也又案𪔐字盧學士文弢校

曰案廣韻𪔐北教切能飛食虎豹正此是也說文𪔐

胡地風犬王從李善注文選作𪔐

王融三月三日曲水詩序注

𪔐

乃小鼠李注或字譌不可從也讀書雜誌王懷祖先

生曰案作𪔐者是也海內北經曰𪔐犬如犬而青食

人從首始注曰音陶或作𪔐音鉤亦以作𪔐者爲是

說文𪔐字解曰北方有𪔐犬食人從虫句聲

徐鉉音古厚切

卽本於海內北經也彼言海內西北陬以東此言渠

叟彼言食人此言食虎豹地與事皆相近彼作𪔐犬

是本字此作𪔐犬是假借字故李善引作𪔐犬而盧

以爲字譌則未達假借之旨也𪔐𪔐字形相似故誤

而爲鼯鼯是鼠屬與蚰犬無涉說文鼯胡地風鼠從
鼠勺聲不云風犬廣韻鼯鼠屬能飛食虎豹出胡地
其云鼠屬出胡地是也而又云能飛食虎豹則惑於
俗本周書之鼯犬而誤盧引廣韻能飛食虎豹而刪
去鼠屬二字又改說文之風鼠爲風犬以牽合鼯犬
其失也誣矣

樓煩以星施

本注一作旄

星施者珥旄

本注文選注羽旄

孔氏曰樓煩北煩

當作戎

地施所以爲旄羽珥

一本本作珥旄所

以爲旄羽耳本注文選注鄭玄曰可以爲旌旗也

王氏補注曰匈奴傳晉北

有樓煩之戎伊尹朝獻商書正北樓煩地理志鴈門

樓煩縣故樓煩胡也

王氏自注故城在代州崞縣京趙世家主父出代西遇樓煩王

於西旄以旄牛尾山海經潘侯山有獸狀如牛而四
節生毛名曰旄牛注背膝及胡尾皆有長毛爾雅犴
牛旄牛也顏師古曰今謂偏牛揚雄甘泉賦流星旄
以電燭荀子西海文旄

秋濤曰按樓煩始見於商初史記云晉北有林胡樓
煩之戎又云趙武靈王北破林胡樓煩築長城自代
並陰山下至高闕爲塞而置雲中鴈門代郡正義引
括地志云趙武靈王長城在朔州善陽縣北陰山在
朔州北塞外突厥界地理志云朔方臨戎縣北有連
山險於長城其山中斷兩峰俱峻名爲高闕也秋濤
按趙破林胡樓煩築長城以爲邊塞則長城以內地

半皆樓煩故壤矣唐朔州善陽縣卽今山西朔平府朔州治也又史云匈奴冒頓南并樓煩白羊河南王侵燕代悉復收秦所使蒙恬所奪匈奴地是樓煩國直至楚漢之間始爲匈奴所滅也史又云衛青擊胡之樓煩白羊王於河南遂取河南地築朔方蓋匈奴滅樓煩仍以其餘眾設樓煩王故又爲衛青所破然衛青所破之樓煩在黃河南爲今鄂爾多斯地趙取樓煩故地以高闕爲塞高闕在陰山西陰山在今吳喇忒旗西北地又跨乎河北蓋樓煩本戎國戰國時特爲強盛故地形寥濶若是西漢鴈門郡樓煩縣在今山西直隸代州崞縣東北

宋崞縣與今治同

此當爲樓煩

之都史記正義引括地志云嵐州樓煩胡地也按唐嵐州又爲樓煩郡在今山西太原府嵐縣北亦古樓煩境內也云星旄者說文旄字注曰晉樂旄字子旗知旄者旗也段氏曰自假旄爲𣎵而旄从𣎵之意隱矣故明之王會訓旄爲旄亦明从𣎵之義可補說文所未備旄是旄旗之類古以犛牛尾注竿首如斗童童然故詩言千旄言建旄言設旄其字从𣎵从毛以形聲兼會意望之若星故曰星旄星旄其懸若珥故曰珥旄也以犛牛尾注旗竿遂謂此旗爲旄因而謂犛牛尾曰旄謂犛牛曰旄牛名之相因者也禹貢兩言羽旄周官旄人旄舞皆謂犛牛尾曰旄也王會之

旄亦猶是也說文犛西南夷長髦牛也犛犛牛尾也此皆正字而經典罕用矣徐星伯先生曰今蘭州青海多旄牛大與常牛等色多青染其毛爲雨纓

卜盧以紉牛紉牛者牛之小者也一本卜作十又牛上無紉字又一本紉作是

孔氏曰卜盧盧人面一無面字西北戎也合盧水是王氏

補注曰牧誓微盧彭濮人注盧在西北立政夷微盧烝括地志房州竹山縣及金州古盧國左氏傳有盧戎紉與綵同詩有捄其角捄曲貌穀梁傳解角注球球然角貌

秋濤曰孔氏以卜盧爲西北之戎者攷漢書西域傳

戎廬國王治卑品城去長安八千三百里戶二百四十口千六百一十勝兵三百人東北至都護治所二千八百五十八里東與小宛南與婼羌西與渠勒接辟今之南不當道又曰精絕國南至戎廬國四日行按戎廬國地當在今土魯蕃之南和闐之東以戎廬爲名其卽古西戎舊國可知又按史記衛將軍驃騎傳曰元狩二年驃騎將軍將萬騎出隴西有功天子曰驃騎將軍率戎士踰烏盭音戾討邀濮索隱曰邀音速濮音卜崔浩云匈奴部落之名按下涉狐奴名水過焉支山千有餘里斬廬胡王張晏曰廬胡國名也又云趙破奴再從驃騎將軍斬邀濮王封破奴爲從驃侯按焉支山括地志云

亦名刪丹山在甘州刪丹縣東南五十里

唐刪丹縣
卽今甘肅

甘州府山
丹縣治

邀濮國在此山之南盧胡國在此山之北

相去已千餘里而我盧國又在其西千里之外蓋皆
古卜盧戎國故壤卜濮古字通用遐荒地廣民稀廣
袤動踰千里不足爲異地在中國之西北陬故孔氏
云西北戎牧誓之盧注以爲在西北核其地勢俱密
合也甘州有合黎水疑卽孔注所云合盧水黎訓爲
黑盧亦訓爲黑音義俱相近也孔穎達書疏不解盧
在西北之義乃云在蜀之西北其說甚謬至浚儀引
括地志及左傳之盧戎爲說攷左傳桓十三年羅與
盧戎兩軍之杜注盧戎南蠻顧氏曰其後地入于楚

爲廬邑

文十六年傳自廬以
往振廩同食是也

今湖北襄陽府南漳縣

東北五十里有中廬鎮卽其地若唐之竹山縣卽今
鄖陽府竹山縣治唐之金州卽今陝西興安府皆在
周之南方按此上下文諸國咸居西北則南方之廬
列此非其次今故不用其說而附辨于此焉紈字从
九與从丸之紈不同廣韻集韻並云紈同綵按紈有
曲義亦有小義曲義取與句口同音說文句曲也口
相糾繚也故凡从句从口之字多以曲爲訓浚儀所
引諸說是也紈與綵同竊考凡从九从求之字多取
小義如爾雅茱櫟醜茱櫟者木實之絕小者也又
杙繫梅本草云卽今山查其實亦甚小又櫟其實攄

王會篇箋釋

卷中

卽椽子亦似栗而小以是推之疑周官牛人所謂求牛亦指牛之小者而言也牛人云凡祭祀共其享牛求牛以授職人而芻之鄭司農以享牛爲前祭一日之牛求牛爲禱于鬼神求福之牛鄭康成則以享牛爲獻神正祭之牛求牛爲終事繹祭之牛今按前祭一日及正祭繹祭所用牛形狀無異似無須分別言之疑享牛指牛之大者宗廟之牛角握是也求牛指牛之小者天地之牛角繭栗是也以其形大小不同故區別言之牛人擇于公牛之中而以授牧人充人養之然後在滌三月而展牲告牲協乎至敬矣

區陽以鼃封鼃封者若菰前後有首

一本無下鼃封二字蓋淺人妄刪

孔氏曰區陽亦戎之名王氏補注曰盛弘之荊州記
武陵郡西有陽山山有獸如鹿前後有頭常以一頭
食一頭行山中有時見之者

秋濤曰孔氏不言區陽所在浚儀引荊州記意以陽
山爲區陽按明史地理志貴州省黎平府有鷓陽土
司地在故武陵郡之西然皆南方之地非西戎也攷
鼈封卽山海經之并封經言并封在巫咸東欲知并
封之所在當先求巫咸之所在地理志云安邑巫咸
山在東漢安邑縣在今山西直隸解州夏縣北畢尙
書云巫咸山在夏縣是也巫咸旣地屬河東并封當
與相近今陝西延安府有區水延安正與河東爲鄰

壤然則產鼈封之區陽當卽區水之陽也疑山海經本作并封在巫咸西輾轉傳寫偶誤西爲東耳西山經云申山區水出焉而東流注于河水經注區水世謂之清水隋書地理志金明有清水元和郡縣志云清水俗名去斤水太平寰宇記謂之濯斤川金史地理志謂之濯巾川水出今陝西安塞縣西北一百五十里蘆關嶺南逕膚施延長宜川三縣入於河按區水所經郡邑皆在西戎地與孔氏所云區陽亦戎之名正爲密合是區陽卽爲今延安府地灼然無疑矣云鼈封卽并封者攷海外西經并封在巫咸東其狀如鼈前後皆有黑首畢注曰王會解云鼈封者若鼈

前後有首并鼈音之緩急疑卽此又大荒西經大荒
之中有山名曰鑿鑿鉅日月所入者有獸左右有首
名曰屏蓬郭注鑿音如敖屏蓬卽并封也語有輕重
耳秋濤按鑿鑿鉅與區字俱一聲之轉區當讀若歐
也日月所入卽西方也鼈并屏皆聲轉字異耳後世
不聞有此物郭注并封云今弩弦蛇亦此類也爾雅
云中有枳首蛇郭注歧頭蛇也或曰今江東呼兩頭
蛇爲越王約髮亦名弩弦按弩弦蛇雖有兩頭然形
非似擬海內經有神焉人首蛇身長如轅左右有首
衣紫衣冠旃冠名曰延維人主得而饗食之伯天下
郭注委蛇也齊桓公出田於大澤見之遂霸諸侯莊

周作朱冠也此亦蛇身而有兩首然非鼈封也大荒
南經南海之外赤水之西流沙之東有獸左右有首
名曰䟽踢郭注出狹名國黠惕兩音畢注曰莊子云
西北之下者洸陽處之陸德明音義云司馬曰洸陽
豹頭馬尾一作狗頭一云神名也呂氏春秋本味篇
云伊尹曰肉之美者述蕩之擊高誘注曰獸名形則
未聞案卽此是也又案䟽踢當爲述蕩之誤篆文足
足相似故亂之玉篇有䟽踢無踢字郭注黠惕之惕
亦當爲踢廣韻作䟽踢引此非也按䟽踢獸形兩頭
或疑卽鼈封之異名誠亦近似然經言左右有首又
與前後有首微別未可遽合爲一物矣郝氏懿行曰

或云并封卽兩頭鹿也後漢書西南夷傳云雲南縣有神鹿兩頭能食毒草注云見華陽國志晉常璩華陽國志云雲南郡蜀建興三年置有熊倉山神鹿一身兩頭食毒草唐陳藏器本草拾遺載蔡苴機兩頭鹿也胎中屎主敷惡瘡蛇虺毒段成式酉陽雜俎曰邪希兩頭鹿也夷謂鹿爲邪矢爲希蓋亦因其矢能療疾故以爲名方以智通雅云蔡苴機兩頭麋也出永昌郡博物志蔡余義獸似鹿兩頭其胎中屎四時取之蔡余義卽蔡苴機也月令廣義引博物志云雲南郡出茶首是兩頭鹿胎可治蛇虺毒以四月取之茶首音蔡茂按卽蔡苴機余與茶苴與首茂與義相

沿而譌升菴元美皆載茶首皆不知蔡苴之譌李時珍本草綱目亦載雙頭鹿云當作茶首機未知孰是按獸類前後有首者惟斯最著荊州記所言亦是此物或卽鼈封而方俗殊名未可知也

規規以麟麟者仁獸也

一本書及注俱作規矩非是又一本奪下麟字獸上奪仁字

孔氏曰規規亦戎也麟似鹿牛尾一角馬蹄也王氏補注曰爾雅麇麇身牛尾一角角端有肉陸璣疏云音中鐘呂行中規矩不履生蟲不踐生草王者至仁則出宋符瑞志成王時麒麟游苑

秋濤曰孔氏以規規爲戎者案規與邾古字通史記秦本紀云武公十年伐邾冀戎初縣之漢地理志隴

西有上邽縣應劭曰卽邽戎邑也西山經有邽山郭
音圭畢尙書曰山在今甘肅秦州西北三十里秦有
邽戎漢有上邽縣其爲字从邑山以邑名也邽戎其
在上古乎或曰山經邽山不聞出麟恐非此也不知
麟鳳本非常有之物爲聖人而出邽戎得而獻之卽
爲周之瑞矣卽如海水不波越裳氏知中國有聖人
亦此義也下文西申之貢鳳鳥亦然又按詩麟之趾
毛傳曰麟信而應禮春秋哀十四年西狩獲麟公羊
傳曰麟者仁獸也禮記禮運曰麟鳳龜龍謂之四靈
按經典多作麟爾雅作麇說文麇牝麒麟也麒麟獸也
麇身牛尾一角按說文以麟爲大牝鹿則麇是本字

麟乃假借字也大戴禮記易本命云有毛之蟲三百六十而麒麟爲之長禮記疏引京房易傳云麟麕身牛尾馬蹄有五彩高丈二又引服虔左傳注云麟中央土獸土爲信信禮之子修其母致其子視明禮修而麟至陸璣疏又云今并州界有麟大小如鹿非瑞應麟也故司馬相如賦曰射麋脚麟謂此麟也按相如賦所云卽大牝鹿之麟故王會特記之曰仁獸所以示靈物應符不侔恆品也又按詩毛氏春秋左傳服氏皆以麟爲信獸公羊氏則以爲仁獸二說不同五經異義許慎謹按龍東方也虎西方也鳳南方也龜北方也麟中央也是異義謂麟爲信獸從毛服說

矣而說文則云仁獸蓋異義早成說文晚定用公羊說以其角端戴肉不履生蟲不折生草也以王會證之則性仁之說當爲定論矣

西申以鳳鳥鳳鳥者戴仁抱義掖信歸有德

一本無歸有德三字

孔氏曰其形似鶴

一作雞

蛇首魚尾戴仁向仁向仁國

抱義懷有義掖信歸有信也

一作歸有德之君也

王氏補注曰

爾雅鳳一名鷟注雞頭蛇頸燕頤龜背魚尾五彩色

高足六尺許山海經丹穴之山有鳥其狀如雞五采

而文名曰鳳皇首文曰德翼文曰義背文曰禮膺文

曰仁腹文曰信自歌自舞見則天下安寧說文神鳥

也天老曰鳳五色備舉出於東方君子之國見則天

下大安寧古作翮象形鳳飛羣鳥從以萬數故亦以爲朋黨字禽經青鳳謂之鵠赤鳳謂之鵠黃鳳謂之鸞白鳳謂之鸞紫鳳謂之鸞蔡邕琴操成王時天下大治鳳凰來舞於庭成王乃援琴而歌曰鳳皇翔兮於紫庭余何德兮以感靈淮南子曰三皇鳳至於庭三代鳳至於澤德彌澆所至彌遠德彌精所至彌近秋濤曰西申孔氏王氏皆不言所在今攷西山經有申山區水出焉畢尙書注疑卽陝西安塞縣北蘆關嶺區水所出也又有上申之山畢注曰疑卽米脂縣北諸山也又有申首之山申水出于其上潛于其下畢注曰按其道里當在榆林府北塞外今有海子山

是歟按榆林在北米脂在東安塞在西相距皆在數
百里之內其山皆以申名惟安塞之申山最在于西
殆卽西申也此山以南旣爲古區陽國地則西申國
當在山北爲今鄂爾多斯右翼前旗境卽古夏州也
地與岐山相近周初鳳集岐山疑亦集于西申故其
國得而獻之攷其地域亦屬西戎上文規規下文氏
羌皆西戎國比類觀之可見矣禮記禮器云升中于
天而鳳皇降論語鳳鳥不至孔安國注云升中于天
則鳳鳥至書君奭我則鳴鳥不聞書傳及鄭氏馬氏
皆以鳴鳥爲鳳孔穎達疏曰詩卷阿鳳皇鳴矣鄭云
時鳳皇至故以喻焉大雅正經之作多在周公攝政

後成王卽位初時已鳳皇至矣復言此者恐不復然

故戒之周語曰周之興也鸞鸞鳴于岐山韋昭曰三

君云鸞鸞鳳之別名也

按說文云鸞鸞鳳屬神鳥也引國語證之解與韋注小異

劉達曰鸞鸞鳳雜也說又異

詩云鳳皇鳴矣于彼高岡其在岐山

之舊乎三君者賈逵虞翻唐固也後漢書賈逵傳云

武王終父之業鸞鸞在岐李賢注鸞鸞鳳別名也然

則文武之時屢有鳳瑞今沖人卽政故恐其不復聞

也王氏鳴盛曰攷公劉洞酌卷阿三詩序皆以爲召

康公戒成王公劉箋云周公反政成王將蒞政召公

與周公相成王爲左右召公懼王不留意治民故作

詩美公劉以戒之此與君奭序台然則君奭與公劉

同時作也其下又隔洞酌然後繼以卷阿箋云因時
鳳至故以喻焉是鳳至在成王卽政後甚久上距作
君奭時多年矣周公作書以鳳至期召公其後果獲
此祥故召公作詩述之道相符應彼國語言鳴于岐
山自是文王時三君乃以卷阿所云當之其說固謬
此經疏又以卷阿爲成王初卽位作其時已有鳳至
今周公慮鳳不再至故又言此亦與鄭不合皆非也
今按西申貢鳳正在成王時與卷阿之鳳至必非一
事然則聖王治世感致休祥固不一足足矣又案王
會止言戴仁抱義掖信歸有德未言有文也山海經
則言首翼背膺腹之文其說益奇畢注曰言首有文

是歸有德翼有文是歸有義背有文是歸有禮下悉
同也非云有文在其身曰德曰義也又按山海經言
鳳其狀如雞而史記正義文選注藝文類聚初學記
引山海經並作其狀如鶴薛綜注東京賦引作鵠鵠
亦鶴也此王會孔晁注所本通觀諸說似以作鶴爲
是說文云天老曰鳳之象也鴻前鸞後蛇頸魚尾鸛
頸鴛思龍文龜背燕頤雞喙五色備舉出於東方君
子之國翱翔四海之外過崑崙飲砥柱濯羽弱水莫
宿風穴見則天下大安寧藝文類聚引景純圖讚云
鳳皇靈鳥實冠羽羣八象其體五德其文附翼來儀
應我聖君

氏羌以鸞鳥

一古作其羌注中氏字皆作其非是

孔氏曰氏羌地羌不同故謂之氏羌今謂之氏鸞文

於鳳

一作大於鳳誤也

亦歸於仁義者也王氏補注曰商頌

自彼氏羌牧誓羌髡說文西方羌从羊地理志隴西

有氏道羌道氏夷種名羌卽西域娒羌之屬括地志

隴右岷洮叢等州西羌也黃氏曰羌古姜姓三苗之

後居三危爾雅疏戎類曰耆羌山海經氏羌乞姓賈

捐之曰成王地西不過氏羌山海經女牀之山有鳥

狀如翟而五彩文名曰鸞鳥見則天下安寧說文鸞

赤色五采雞形鳴中五音頌聲作則至成王時氏羌

獻焉

王氏自注漢蔡衡曰凡象鳳者五多青瑞應圖色者鸞徐鍇曰鸞似鳳而青與說文異

鸞鳥赤神之精鳳皇之佐尙書中候周公歸政於成

王太平制禮鸞鳥見

王氏自注鸞經鸞鳴雍雍鳳鳴喈喈淮南子羽嘉生飛龍飛龍

生鳳皇鳳皇生鸞鳥

秋濤曰大戴禮記孔子對哀公述虞舜夏禹成湯文

王之治皆云海外肅慎北發渠搜氏羌來服是氏羌

自虞時已爲建國說文羌西方牧羊人也詩鄭箋云

氏羌夷狄國在西方孔氏曰氏羌之種漢世仍存其

居在秦隴之西李巡說耆羌爲西戎之一耆羌卽氏

羌也海內經曰伯夷父生西岳西岳生先龍先龍是

始生氏羌此氏羌之先也竹書紀年成湯十九年氏

羌來貢武丁三十四年氏羌來賓曹氏曰成湯之時

氏羌之國近者以時聘享遠者亦來終王氏羌自謂此湯之典常也武王伐紂羌髡會于牧野蓋氏羌密邇豐鎬資其力以滅殷與他要荒之國不侔矣史記匈奴傳西接氏羌索隱曰按風俗通云二氏本西南夷種地理志武都又白馬氏又魚豢魏略云漢置武都郡非其種人分竄山谷或號青氏或號白氏按海內經謂氏羌乞姓而續漢書云羌三苗姜姓之別裔徙于三危未詳孰是史記西南夷傳自駝以東北君長以十數白馬最大皆氏類也後漢書有西羌傳自後事跡詳載史冊秋濤按氏羌地域最廣如浚儀所舉漢之氏道在今甘肅直隸秦州清水縣西南羌道

在今甘肅直隸階州西北一百六十里邊外括地志
所云岷州卽今甘肅鞏昌府岷州是洮州在今鞏昌
府洮州廳西南七十里叢州當在今四川境又王氏
詩地理考曰疊宕松諸州皆羌地按疊州在今洮州
廳邊外南二百里宕州有二屬隴右道者在今岷州
西南屬劍南道者在今四川直隸茂州西南又按西
漢甸氏道屬廣漢郡在今階州文縣西又剛氏道亦
屬廣漢郡在今四川龍安府平武縣東又湍氏道屬
蜀郡在今龍安府松潘廳西北又破羌縣屬金城郡
在今甘肅西甯府碾伯縣西又臨羌縣亦屬金城郡
在今西甯府西甯縣西以上皆氏羌地之尤著者也

大抵今甘肅西南四川西北青海之地皆古氐羌出沒之所西羌傳謂其所居無常依隨水草蓋與匈奴行國同俗秦厲共公時羌無弋爰劍居河湟閒秦獻公時爰劍孫卬南出賜支河曲西數千里與眾羌絕遠不復交通其後子孫或爲犍牛種越嶲羌是也或爲白馬種廣漢羌是也或爲參狼種武都羌是也凡此皆輾轉流徙莽復氐羌故地或概指爲古氐羌斯爲乖矣山海經郭璞注云舊說鸞似雞瑞鳥也周成王時西戎獻之按西戎卽指氐羌畢尙書曰薛綜東都賦注曰女牀山在華西六百里考地理諸書山無所見按其道里或卽鳳翔府岐山縣岐山也秋濤按

說文以鸞爲神靈之精其形似雞疑世所傳陳倉寶雞蓋卽鸞也岐山以西迫近西戎故女牀之鸞氏羌得以爲獻古人謂鈴爲鸞蓋象其聲也

巴人以比翼鳥

孔氏曰巴人在南者比翼鳥

一無此三字非

不比不飛其名

鵜鵜王氏補注曰左傳注巴國在巴郡江州縣

王氏自注

今渝州巴縣秋濤按卽今四川重慶府附郭巴縣是

郡縣志渝州古巴國也閬

白二水東南流曲折如巴字故謂之巴武王伐殷巴

人助焉其人勇銳歌舞以凌殷郊後封爲巴子其地

東至魚復西犍道接漢中南極牂柯

王氏自注巴子城在合州石鏡

縣南五里

山海經後照始爲巴人爾雅南方有比翼鳥焉

不比不飛其名謂之鵜鵜注似鳧青赤色山海經崇
吾之山有鳥其狀如鳧而一翼一目相得乃飛名曰
蠻蠻見則天下大水注比翼鳥也南山在結匈東南
比翼鳥在其東其爲鳥青赤兩鳥比翼管仲曰西海
致比翼之鳥王氏自注曰山海經其名曰鸞瑞應
圖王者德及高遠則至王嘉拾遺記成王時燃邱國
獻之狀如鵲而多力張華以爲一青一赤在參嵎山
秋濤曰按海內經云西南有巴國大皞生成鳥咸鳥
生乘釐乘釐生後照後照是始爲巴人注爲之始祖
也海內南經云夏后啟之臣曰孟涂是司神于巴巴
人訟于孟涂之所其衣有血者乃執之竹書紀年云

帝啟八年使孟涂如巴苳訟是其事也晉常璩華陽國志巴志曰人皇始出兄弟九人分理九州爲九囿華陽之壤梁岷之域是其一囿囿中之國則巴蜀矣其君上世未聞五帝以來黃帝高陽之支庶世爲侯伯周武王伐紂實得巴蜀之師著乎尙書巴師勇銳歌舞以凌殷人倒戈故世稱之曰武王伐紂前歌後舞也武王旣克殷封其宗姬于巴爵之以子古者遠國雖大爵不過子故吳楚及巴皆曰子春秋桓九年巴子使韓服告楚請與鄧爲好楚子使道朔將巴客聘鄧鄧南鄙攻而奪其幣巴子怒伐鄧敗之其後巴師楚師伐申莊十八年巴伐楚克之文十六年巴與

秦楚共滅庸哀十八年巴人伐楚敗於鄢是後楚主
夏盟秦擅西土巴國分遠故於盟會希與戰國時嘗
與楚婚及七國稱王巴亦稱王周顯王時楚國微弱
秦惠文王與巴蜀爲好蜀王弟苴稱親於巴巴蜀世
戰爭周慎靚王五年蜀王伐苴侯苴侯奔巴巴爲求
救於秦秦遣張儀司馬錯救苴巴遂伐蜀滅之儀貪
巴苴之富因取巴執王以歸置巴郡又曰巴子都江
州縣名卽今巴縣或治墊江或治平都後治闡中一統志云
漢仍爲巴郡治江州縣屬益州後漢因之獻帝初平
元年征東中郎將安漢趙穎建議分巴爲二郡穎欲
得巴舊名故曰益州牧劉璋以墊江以上爲巴郡龐

義爲太守治安漢以江州至臨江爲永寧郡胸臆至
魚復爲固陵郡建安六年魚復蹇胤白璋爭巴名乃
改永寧爲巴郡以固陵爲巴東徙義爲巴西太守是
爲三巴其巴郡歷蜀漢晉宋齊俱爲巴郡至隋初廢
郡改曰渝州唐曰渝州南平郡宋崇寧初改爲恭州
紹熙初升爲重慶府元改爲重慶路明仍爲府卽今
四川重慶府是也又按自古言巴江者不一三巴記
云闔白二水南流曲折三面如巴字則專指嘉陵江
太平寰宇記所謂巴江則在通江縣界皆不以巴州
之水爲巴江也元豐九域志始言化成縣有巴江自
後遂獨以南江派水當之與古說異文獻通考巴州

巴江自古集州來派於郡治之右狀如巴字又曰字
江輿地紀勝北江至巴州城東南分爲三流其中有
小流橫貫成巴字故以爲名一統志曰南江縣巴江
卽古宕渠水也秋濤按說文巴象蛇形蜀訓爲蟲巴
蜀皆自古建國蓋因其地所有之物爲名如胸臆縣
因其地多胸臆蟲卽以爲名正是其例所稱江學字
流之說不足據也又按西山經言崇吾山有蠻蠻之
鳥郝氏懿行曰博物志云崇邱山有鳥一足一翼一
目相得而飛名曰蜎又云比翼鳥一青一赤在參隅
山今案蜎蠻聲之轉參隅崇邱亦聲之轉也秋濤按
崇吾之山博物志及史記索隱俱引作崇邱昔人未

詳所在今按西山經載崇吾山西北三百里曰長沙之山泚水出焉北流注于泐水泐水卽泐澤也又西北三百七十里曰不周之山在今新疆之地以此攷之則崇吾之山亦當在新疆與泐澤附近管仲所云西海當據山經而言固不誤也王會巴人所獻則又產於蜀地者巴在西南故爾雅又以爲南方有比翼鳥也至王嘉拾遺記則皆荒誕之說耳不足徵信

方揚以皇鳥

揚一本作揚

孔氏曰方揚

一作揚

亦戎別名皇鳥配於鳳者也王氏

補注曰爾雅鳳其雌皇符瑞志其鳴雄曰節節雌曰足足詩鳳皇鳴矣于彼高岡荀子詩曰鳳凰秋秋其

翼若干其聲若簫

秋濤曰孔氏知方揚亦戎別名者蓋以方揚爲揚戎也左傳僖十一年揚拒泉皋伊雒之戎同伐王城江氏曰揚拒泉皋在今河南府境按文八年公子遂及雒戎盟于暴國語北有洛泉徐蒲知此戎種類不一然其始當在西方非居于伊雒也攷秦晉遷陸渾之戎于伊川其戎始居瓜州卽漢燉煌郡今甘肅直隸安西州地自瓜州遷于伊川計道途數千餘里以是推之揚拒泉皋之戎蓋亦自西方遷至者成王時入貢當是戎居西方未遷時也隋書地理志有符陽縣屬梁州清化郡在今四川保寧府通江縣北七十里

按符與方一聲之轉疑符陽或卽古方揚地未可知也又按大荒西經芒山有五彩鳥三名一曰皇鳥一曰鸞鳥一曰鳳鳥按芒與方揚音近疑卽一地或曰大荒西經西有王母之山有沃之國沃民是處沃之野鳳鳥之卵是食甘露是飲凡其所欲其味盡存爰有甘華甘祖白柳視肉三騅琬瑰瑤碧白木琅玕白丹青丹多銀鐵鸞鳥自歌鳳鳥自舞按王母與方揚聲亦相近又疑方揚卽王母山故有皇鳥也

爾雅皇黃鳥邵

氏晉通注疑卽王會之皇鳥此前人所未言者存以備攷

蜀人以文翰文翰者若皋雞

孔氏曰鳥有文彩者皋雞似鳧冀州謂之澤特也皋

一作皇王氏補注曰蜀見于牧誓華陽國志蜀之先
肇於人皇之際黃帝爲子昌意娶蜀山氏後子孫因
封焉寰宇記蠶叢始稱王次曰柏灌次曰魚鳧其後
杜宇號望帝以褒斜爲前門熊耳靈關爲後戶玉壘
峨眉爲池澤禪位於開明自開明而上至蠶叢凡歷
千歲秦以其地爲蜀郡王氏自注今成都府秋濤爾
按卽今四川成都府是
雅鞠天雞注鞠彩赤羽逸周書曰文鞠若彩雞成王
時蜀人獻之說文翰天雞赤羽也逸周書文翰若翬
雉一名鷩風周成王時獻之鞠雉肥鞠音者魯郊以
丹雞祝曰以斯鞠音赤羽去魯侯之咎

秋濤曰按黃帝爲子昌意娶蜀山氏女生子帝嚳封

其支庶于蜀世爲侯伯周慎靚王五年秦使張儀司
馬錯伐蜀滅之置蜀郡焉又按爾雅鶡天雞从鳥此
篇文翰从羽按說文羽部翰天雞赤羽也引逸周書
文翰若翬雉云云鳥部鶡雞肥翰音者也雞肥本作
雉肥翰音
本作鶡音今
從投本改正魯郊以丹雞云云然則鶡字本訓爲雞
之肥者翰字則訓爲天雞王會文翰卽天雞是也爾
雅今本作鶡乃假借字耳釋文鶡本又作翰樊云一
名山雞按山雞雖赤羽復無天雞之名山雞卽鷓鴣
鷓鴣釋名所說是也郝氏懿行曰今所謂天雞出蜀
中者背文揚赤膺文五彩爛如舒錦一名錦雞未知
卽爾雅所釋否也秋濤按此雞旣蜀產又有文彩與

爾雅王會俱合其爲文翰無疑又按爾雅有韃雉鶉
雉說文分爲二故云雉有十四種郭璞注則謂一物
二名卽白雉也西山經嶠冢之山鳥多白翰赤鷩注
白翰白鶉也亦名鶉雉又曰白雉北山經單張山有
鳥其狀如雉而文首白翼黃足名曰白鶉郭音夜畢
尙書曰此卽爾雅鶉雉郭云今白鶉也江東呼白韃
亦名白雉是也北次二經謂之白鶉鶉鶉音同古無
此字皆後人以聲合之秋濤按爾雅之韃卽今之鶉
字後世所稱白鶉卽白韃字亦作翰鶉與此文翰爾
雅作鶉者不同故附列之又爾雅鶉雉字从卓郭注
今白鶉也江東白鶉釋文鶉丁單切至西山經郭注

之白鶡乃白鶡之省字體相似而音讀迥異所宜詳辯者也

方人以孔鳥

孔氏曰方人亦戎別名孔與鶡相配者

一作孔與王鶡相匹也

氏補注曰東夷傳九夷有方夷竹書紀年少康卽位方夷來賓孔雀生南海蓋鸞鳳之亞藝文類聚引周書曰成王時西方人獻孔雀山海經南方多孔鳥春秋元命苞火離爲孔雀異物志大如鴈而足高細頸龍背似鳳白背及尾皆珠文五彩光耀長短相次羽毛末皆員文五色相繞頭戴三毛長寸以爲冠足有距迎晨則鳴相和人指其尾則儻交州記色青尾長

六七尺能舒舞足爲節

王氏自注漢南
粵獻孔雀二雙

秋濤曰孔氏云方人亦戎別名蓋因王會列於巴蜀
之次故知其爲西戎浚儀引東方之方夷釋之非也
詩小雅往城于方毛傳曰方朔方近獫狁之國也朱
子曰今靈夏等州之地又侵鎬及方鄭箋曰鎬也方
也皆北方地名朱子曰方疑卽朔方也按朔方之方
地在西北與巴蜀絕遠又孔雀爲炎方之禽其性畏
寒未聞朔方曾有是鳥則南仲所城之方與王會之
方蓋同名異地矣以今參攷諸書方人當卽鬼方易
高宗伐鬼方詩大雅內巽於中國覃及鬼方毛傳曰
鬼方遠方也大戴禮帝繫曰陸終娶於鬼方氏漢書

匡衡傳曰成湯化異俗懷鬼方又五行志注曰鬼方
絕遠之地一曰國名文選注引世本注曰鬼方於漢
則先零戎是也後漢西羌傳曰武丁伐西戎鬼方要
之武丁既伐鬼方則鬼方自是國名不得以遠方概
之世本注西羌傳皆以鬼方爲西戎卽孔氏晁所稱
方人爲戎別名者也然所云先零卽氏羌王會上文
已有氏羌則鬼方自別是一種竹書紀年云武丁三
十二年伐鬼方次于荆三十四年王師克鬼方以此
推之鬼方當在荆之外徼故伐鬼方必先次於荆矣
一統志云貴州布政使司禹貢荆梁二州外徼商周
爲鬼方地是也今貴州貴陽府屬有方番長官司在

定番州南八里元置方番河中府安撫司爲八番之
一是方番之名其來已久方人或卽其地未可知也
又按劉逵注蜀都賦云孔雀特出永昌南涪縣又注
吳都賦云孔雀尾長六七尺綠色有華彩朱崖交阯
皆有之在山草中秋濤按永昌卽今雲南永昌府爲
古濮人地朱崖今廣東瓊州府崖州交阯今越南方
人在貴州與此諸地皆近故得孔雀以爲貢楚辭云
實孔鸞之所居又云鸞皇孔鳳日以遠兮又云孔雀
盈園畜鸞皇只是古人多以鸞孔並稱故孔氏云與
鸞相配也

卜人以丹砂

本注一作沙

孔氏曰卜人西南之蠻丹砂所出王氏補注曰太平

御覽卜人蓋今之濮人也伊尹爲四方獻令正南百

濮牧誓注濮在江漢之南爾雅南至於濮鉛郡國志

越嶲會無縣華陽國志曰故濮人邑

秋濤按漢會無縣今四川甯遠

府會理州治

左氏傳巴濮吾南土也劉伯莊曰濮在楚西

南鄭語楚蚡冒始啟濮永昌郡傳曰雲南郡多夷濮

秋濤按晉宋雲南郡在今雲南大理府雲南縣北十里非今之雲南府也

禹貢荊州貢丹

山海經柜山多丹粟注細丹砂如粟荀子南海有丹

干本草丹砂生符陵山谷

王氏自注今出辰宜諸州而辰最勝多出錦州界狹

獠職方氏荊州其利丹銀

秋濤曰按杜佑通典引王會卜人而釋之曰卜人蓋

濮人也御覽之說本此攷劉伯莊謂濮在楚西南而
不指言其所在惟杜元凱春秋釋例土地名言之爲
詳其說曰建甯郡南有濮夷無君長總統各以邑落
自聚故稱百濮又稱叟濮後漢李恢傳賦出叟濮是
也近儒江氏永以百濮當在湖北石首縣南蓋因杜

說建甯郡而誤解

左傳文十六年麋人率百濮聚于

在今荆州府石首縣百濮在其南又昭曰晉建甯故城
在杜注今建甯郡南有濮夷春秋彙纂曰按晉建甯
郡在今雲南界杜蓋極言其所至也江氏曰按晉建
甯郡故城在今石首縣非雲南界也又昭九年巴濮
楚鄧吾南土也疏曰土地名云建甯郡南有濮夷地
然則巴楚鄧中夏之地濮爲遠夷耳江氏曰濮爲江
漢間之濮夷又昭十九年楚子爲舟師以伐濮杜注
南夷也彙纂曰百濮伐楚杜注夷也吳濮有濮杜注
建甯郡南有濮夷此注南夷三注不同而約言其地
當在楚之西南境江氏曰按文十六年麋人率百濮

伐楚麋爲今之鄖陽百濮蓋與之相近牧誓孔傳云
濮在江漢之間然則其地在楚之西北境耳秋濤按
一統志晉建甯郡在今雲南曲靖府南甯縣南十里
若石首則並無晉建甯郡故城江氏誤也且晉建甯
郡屬甯州所轄皆雲南地若晉荊州所屬各郡並無
建甯地志可覆按也以江氏於春秋地理言之頗詳
恐讀者易爲所惑故詳之如此王氏鳴盛以濮人當在湖南辰州府
則又因其貢丹砂而誤釋王氏鳴盛曰通典辰州貢
州府實古濮地也顧氏棟高曰百濮在雲南曲靖府
境或曰在湖廣常德辰州二府境秋濤按荊州出丹
砂之地多矣非皆濮人所在也春秋時楚地不到湖
南其與百濮接壤地皆在楚國之西歷歷可攷出丹
砂者自是永昌之濮非辰州也說詳下文又按或以
常德府爲濮地亦於古無徵特因江氏謂建甯郡在
石首南其南卽常德境故爲此其實濮在雲南自魏
言耳江說旣非餘可比類而知其實濮在雲南自魏
晉以來諸家無異說其種類至今猶存灼然可證不
必疑也或因左傳載麋人率百濮伐楚是濮近楚又

近麋當在楚西北張平子賦所謂巴中之濮稍爲近

之

張平子蜀都賦云於東則左緡巴中百濮所充注今巴中七姓有濮江氏曰此又別一濮蓋百濮之

散處者

遂有疑雲南之濮非古濮人者不知濮之本國

實在雲南而其境土之廣則東至曲靖西逾永昌北極會理凡數千里自會理之東北抵巴之東楚之西山谷之閒蓋往往有濮之種類以其多不可紀謂之百濮猶越封東南本國實在會稽而春秋時西境至江西之鄱陽秦漢閒百越之地直包閩廣不得執一以相疑也當商之初百濮散處故伊尹四方令稱百濮及商末周初之時雲南之濮蓋嘗會合于一爲強盛之國是以武王誓師特舉以布告多方而成王時

又修職貢皆言濮人而不稱百濮則其合爲一國明矣此猶唐時六詔之合爲一詔也至春秋時濮勢亦盛能爲楚患鄭語史伯曰叔逃難于濮而蠻又曰楚蚡冒始啟濮韋昭注濮南蠻之國皆楚濮相逼之證故昭元年晉人謂楚曰吳濮有釁楚之執事豈其顧盟明楚之於濮不能不用兵也吳之疆域東極于海而西與楚接凡數千里濮之疆域西逾永昌而東北與楚接壤亦數千里事勢固然無足異者其東北近楚之邑落北鄰庸之魚邑卽今夔州府西際巴之江州卽今重慶當在今湖北宜昌施南以西四川夔州以南重慶以東沿江之地石砮等廳蓋其故壤其地距雲南之濮國本境

既遠又皆小小部落故仍謂之百濮文十六年麋人率百濮以伐楚及楚出師則皆罷去蔣賈所謂百濮離居將各走其邑者正謂是也昭十九年楚子爲舟師以伐濮亦因其沿江故可用舟師以伐之也至戰國時濮國無聞而巴人七姓中有濮蓋巴強盛因并吞濮人之近巴者其雲南之濮亦自衰微而種類尙存後莊躋伐滇諸夷服屬百濮當亦在其中史闕略而不言耳至晉宋時濮地在版圖之中故能備紀其風俗如諸書所云也爾雅南至於濮鉛謂之四極郭注皆四方極遠之國不言所在邵氏晉涵引百濮證之按廣韻獫狁字注曰獫狁鉛南極之夷尾長數寸巢居

山林出山海經今經無此語太平御覽七百九十一
卷載永昌郡傳曰郡西南千五百里徼外有尾濮尾
若龜形長四五寸欲坐輒先穿地空以安其尾若遯
遁誤折尾便死扶南土俗傳曰拘利東有蒲羅中人
人皆有尾長五六寸按其地並西南蒲羅蓋尾濮之
地名也

秋濤按蒲卽濮也御覽七百八十七卷又有蒲羅中國卽此

又引永昌郡

傳曰雲南郡在建甯南治雲南縣亦多夷濮分布山
野大小蹲踞道側皆持數種器仗時寇鈔爲郡邑之
害又引郭義恭廣志曰木綿濮土有木綿樹又有文
面濮折腰濮赤口濮又墨熨濮在永昌西南山居其
境出白蹄牛馬犀象武魄金銅華布又梁祚魏國統

曰西南有夷名曰濮其地出璫瑁犀象珠璣金銀葛
越人皆蠻夷重譯乃通也合觀諸說足見濮之地廣
類繁矣又按南山經雞山其上多金其下多丹腹黑
水出焉而南流注于海郝氏懿行曰雞山今在雲南
郡國志云永昌郡博南界出金劉昭注引華陽國志
云西山高三十里越得蘭滄水有金沙今按博南西
山疑卽雞山蘭滄水卽黑水矣案雞山出丹正永昌
卽古濮人之堅證唐書南蠻傳永昌蠻西有樸子蠻
以青娑羅爲通身袴善用竹弓入林射飛鼠無不中
者無食器以蕉葉藉之人多長大趨悍負排持稍而
鬪滇程記以爲卽蒲蠻通志百夷卽僂夷又名蒲蠻

一統志蒲關亦曰蒲蠻關在保山縣南三十里滇略
蒲人散居山谷無定所鳳池施甸二司及十五哨二
十八寨皆其種也秋濤按蒲濮濮俱一聲之轉此種
名百夷又曰蒲蠻卽百濮也曲靖會無有濮人而無
丹砂辰沅等處有丹砂而非濮地惟永昌有濮人有
丹砂則王會之濮人卽今永昌府地無疑

夷用闌木

一本木作采誤

孔氏曰夷東北夷也木

一作采誤

生水中黑色而

一作面誤光

其堅若鐵王氏補注曰山海經夷人在東胡東崔豹
古今注烏文木出波斯國集韻闌木名

王氏自注南茲消切

方草木狀文木樹高七八丈色正黑如牛角

秋濤曰孔氏以夷爲東北夷非也說文以夷爲東方
之人海內西經載大澤在鴈門北東胡在大澤東夷
人在東胡東故孔以爲東北夷信如其說則王會不
應列於巴濮之後矣按諸史多稱西南夷是西南亦
有夷名不得概指爲東北也今按此夷當卽波斯二
字音與夷字近也瀛寰志略曰波斯亦作白西亦作
包杜亦作巴社亦作高奢亦作百爾設亦作法耳西
亦作北耳西亞亦作巴爾齊亞亦作伯爾西亞亦作
伊蘭亦作哈烈亦作黑魯亦作塞克回部大國也粵
東呼爲大白頭呼印度爲小白頭兩地皆有白布纏
頭之俗因以爲名者也東北連沙漠界布哈爾東界

阿富汗俾路芝西接東土耳其北抱裏海與戔羅斯
接壤南抵阿勒富海與阿剌伯毗連一隅其國地界
遼闊長約四千餘里廣約三千餘里雄富多寶貨與
中國貿易最早所謂碧眼波斯胡也又曰波斯開國
最早漢書稱爲安息唐書稱大食波斯泰西則稱爲
波斯至今未改或譯爲包社白西亦猶是波斯轉音
元人稱爲哈烈乃以蒙古語更易地名其國在布哈
爾之西南愛烏罕之正西並非絕域其人長於服賈
西域諸城亦必往來數數而近來記西域事者絕無
一語及於波斯蓋賈人止稱城邑聚落之名記事者
因譌襲謬遂不復知爲何國耳按泰西人自記波斯

立國在有夏之初卽名波斯漢書作安息蓋譯語稍異息與斯音相近也方以智通雅曰闌木卽烏木也古今注云烏文木出波斯舶上將來烏文闌然溫括婺等州亦出之吳都賦文櫬楨檀注文文木也材密緻無理色黑如水牛角日南有之本草綱目曰烏木一名烏栲木一名烏文木出海南雲南南番葉似櫻櫚其木漆黑體重堅緻可爲筋及器物今按說文黝黑木也疑闌木卽黝木矣

康人以桴苡桴苡者其實如李食之宜子

一作康民又奪去下桴苡

字二

孔氏曰康亦西戎別名也食桴苡卽有身王氏補注

曰隋書康國康居之後也唐以其地爲康居都督府漢西域傳康居去長安萬二千三百里說文芣苢一名馬舄其實如李令人宜子周書所說或从以山海經芣苢木也王肅引周書云芣苢如李出於西戎王基駁云王會所記雜物奇獸皆四夷遠國各齎土地異物以爲貢贄非周南婦人所得采芣苢爲馬舄之草非西戎之木也

秋濤曰按隋書康國者康居之後遷徙無常不恆故地然自漢以來相承不絕其王姓溫月氏人也舊居祁連山北昭武城因被匈奴所破西踰蔥嶺遂有其國支庶各分王故康國左右諸國並以昭武爲姓示

不忘本也都於薩寶水上阿祿連城

連一作迪

唐書曰貞

觀九年貢獅子太宗嘉其遠至命祕書監虞世南爲之賦按隋書言康居王本月氏人從祁連山西徙而漢書西域傳止言月氏西徙擊大夏而臣之不言其兼服康居也疑漢時康居本別爲一國非月氏之種至漢以後爲月氏所并使其子弟爲王故隋書溯其祖於昭武耳以是推之則王會之康人自當在蔥嶺以西爲漢之康居國或指爲祁連山側之國是誤讀隋書不足爲據矣又按爾雅釋草芣苢馬舄馬舄車前陸德明釋文引說文芣苢其實如李令人宜子周書所說徐鍇說文繫傳曰按本草芣苢一名車前服

之令人有子爾雅注亦同韓詩云茱萸木名實似李則非也許慎但言李則其子之苞亦似李但微而小耳段氏玉裁曰按韻會引說文李作麥似近之但未知其何本陸德明徐鍇所據已作李矣詩音義曰山海經及周書皆云茱萸木也今山海經無茱萸之文若周書正文未嘗言桴萸爲木陶隱居又云韓詩言茱萸是木食其實宜子孫此蓋誤以說周書者語系之韓詩德明引韓詩直曰車前瞿曰茱萸李善引薛君曰茱萸澤瀉也韓詩何嘗說是木哉竊謂古者殊方之貢獻自出其珍異以將其誠不必知中國所無而後獻之然則茱萸無二不必致疑於許偁周書也

又案西山經崇吾之山有木焉員葉而白柎赤華而黑理其實如枳食之宜子孫郝氏懿行曰按周書王會篇云康民以桴苳云云說文引書作苳苳繫傳引韓詩亦云苳苳木名實如李陶注本草車前子亦引韓詩言苳苳是木似李食其實宜子孫與周書合是知苳苳有草有木周書所說是木類疑卽此秋濤按爾雅毛傳皆以苳苳爲草說文始引周書以周事證周詩最爲切近自王基駁王肅謂遠國貢贄非周南婦人所得采後人遂多河漢其言按王會所貢如周頭之羊黑齒之白鹿白馬長沙之鼈路人之竹禽人之管皆中國常有之物不以爲疑何獨疑於苳苳哉

得茂堂之說以通其郵可冰釋矣惟段氏以爲茅苴止有草無木郝氏據山海經以爲有草木二種今亦存以備一說云

州靡費費其形人身反踵自笑笑則上脣翕其目食人北方謂之吐嚙

本注說文作土螻反踵一作枝踵

孔氏曰州靡北狄費費曰臬羊好立行如人被髮前足指

一有稍字

長王氏補注曰漢書注臬陽費費也人面

黑身有毛反踵見人則笑脣蔽其目

王氏自注淮南子山內臬陽

山海經臬陽國在北胸之西其爲人人面長脣黑身有毛反踵見人笑亦笑左手操管注海內經謂之顛

王氏自注音感巨人今交州南康郡深山中皆有此物也長

丈許腳跟反向健走被髮好笑雌者能作汁灑中人

卽病土俗呼爲山都南康今有賴水以有此人因以

名水

王氏自注崑崙之邱有獸其狀如羊而四角名曰土螻是食人

爾雅狒狒如人

被髮迅走食人

王氏自注梟羊也秋濤按此係郭注又云交廣及南東郡山中亦有此物

大者長丈許俗呼之曰山都

說文成王時州靡國獻鬬或作狒氏

自注父

左思吳都賦萬萬笑而就格張衡玄圖梟羊

喜獲先笑後愁

秋濤曰州靡諸家不言所在按王會次于巴濮之後

當爲西南夷孔氏云北狄非也攷陳藏器本草拾遺

曰狒狒出西南夷史記云西南夷君長以什數夜郎

最大其西靡莫之屬以什數滇最大索隱曰靡莫夷

邑名正義曰靡非在姚州北去京西南四千九百三十五里卽靡莫之夷史記又云元封二年天子發巴蜀兵擊滅勞漫靡莫索隱曰二國與滇同姓秋濤按唐姚州在今雲南楚雄府姚州北靡莫又在其北蓋卽古州靡國地也費費徃徃皆南方之獸厯攷紀載北方未聞有是姚州地處西南與巴濮壤接故以費費爲貢覈諸事理斯爲近之又按費費爾雅作狒狒說文引王會作鬿鬿郭注引作鬿鬿吳都賦作萬萬皆同音互轉以象形字言之當以說文爲正疑此篇費字蓋後人改之或記其音

說文云讀若費

遂誤爲正字也

王懷祖先生讀書雜志曰翕其目翕當作弇字之誤

也翁與弇不同義翁合也弇蔽也此謂上脣蔽其目
非合其目之謂也費費說文作𩇛𩇛云周成王時州
靡國獻𩇛𩇛人身反踵自笑笑卽上脣弇其目食人
又云一名梟陽全用此篇之文而其字正作弇海內
南經注引周書曰州靡髣髴者人身反踵自笑笑則
上脣掩其面掩弇古字通則翁爲弇之誤益明矣又
海內經曰南方有顓巨人郭注卽梟陽也人面長脣黑身有
毛反踵見人則笑脣蔽其面蔽亦弇也王先生又曰
吐噀本作土螻此螻誤爲噀而土因誤爲吐也爾雅
疏引此已誤說文廣韻爾雅釋文及太平御覽獸部
二十皆作土螻西山經云崑崙之邱有獸焉其狀如

羊而四角名曰土螻此與費費同名而異物然其字亦作土螻秋濤按劉逵吳都賦注云梟羊喜食人大口其初得人喜而笑卻脣上覆額移時而後食之人因爲筒貫於臂上待執人人卽抽手從筒中出鑿其脣於額而後禽之本草拾遺曰宋建武中獠人進雌雄二頭帝問土人丁鑾鑾曰其面似人紅赤色毛似獼猴有尾能人言如鳥聲善知生死力負千鈞反踵無膝睡則倚物獲人則先笑而後食之獵人因以竹筒貫臂誘之俟其笑時抽手以錐釘其脣著額候死而取之髮極長可爲頭髮血堪染韡及緋飲之使人見鬼也帝乃命工圖之李時珍曰按方輿志云狒狒

西蜀及處州山中亦有之呼爲人熊人亦食其掌剝其皮閩中沙縣幼山有之長丈餘逢人則笑呼爲山丈人或曰野人及山魃也又鄧顯明南康記云山都崑崙人通身生毛見人輒閉目開口如笑好在深澗中翻石覓蟹食之珍按鄧氏所說與北山經之山獠述異記之山都永嘉記之山鬼神異經之山獠玄中記之山精海錄雜事之山丈文字指歸之旱魃搜神記之治鳥俱相類乃山怪也秋濤按淮南子汜論訓云山出嶧陽高誘注嶧陽山精也人形長大而黑色身有毛若反踵見人而笑是費費本有山精之名瀕湖本草以諸奇物附之固其所也景純山海經圖讚

云狒狒怪獸被髮操竹見人則笑脣蔽其目終亦號
咷反爲我戮

都

本注一

郭狺狺

本注一欺羽

二字

無此

狺狺若黃狗人

面能言

孔氏曰都郭北夷狺狺獸名

一作都郭生是北狄二名非是

王氏補

注曰山海經汜林方三百里在狺狺東狺狺知人名

其爲獸如豕而人面爾雅猩猩小而好啼注山海經

人面豕身能言語今交阯封谿縣出猩猩狀如獾狔

聲似小兒啼荀子曰猩猩形笑亦二足毛也博物志

若黃狗與周書同左思吳都賦猩猩啼而就擒淮南

萬畢術猩猩知往郭璞贊曰厥狀似猴號音若嬰水

經注形若狗而人面頭顱端正善與人言音聲妙麗如婦人

秋濤曰孔氏以都郭爲北夷非也按諸書記猩猩產

于交趾哀牢邛都等境皆在西南徼無出北地者惟

誘淮南子注以爲北方獸名郝氏況王會都郭國次

懿行曰猩猩南方獸作北方誤也於西南夷巴濮之後其非北方之國甚明以今攷之

當卽交州西南之都昆國也杜佑通典邊防部敘南

蠻曰邊斗國都昆國拘利國比嵩國並隋時聞焉扶

南度金鄰大灣南行三千里有此四國其農作與金

鄰相同其人多白色都昆出好棧香藿香及流黃云

云按昆與郭一聲之轉扶南地近交趾故有猩猩可

以充貢也。郝氏懿行爾雅義疏曰：小而好啼，文義難通。當由轉寫致譌。若好作如小，而作小兒，倒轉讀之，則通矣。郭注似小兒啼，可證。今按太平御覽引爾雅作猩猩小兒啼，其所見本不誤也。又按郭注海內南經云：今交州封谿縣出狴狴，土俗人云狀如豚而後似狗聲，如小兒啼也。或作猩猩，字同耳。海內經云：有青獸人面，名曰狴狴。注曰：能言。淮南子汜論訓云：猩猩知往而不知來。高誘注：人面獸身，黃色。禮記曲禮曰：猩猩能言，不離走獸。今禮記作禽獸，蓋所見本異也。見人往走，則知人姓字，此知往也。又嗜酒，人以酒搏之，飲而不能息，不知當醉，以擒其身。故曰：不知來也。後漢書西南

夷傳云哀牢出猩猩注云猩猩在山谷見酒及麕知其設張者卽知張者先祖名字乃呼其名而罵又通典曰據華陽國志云永昌郡有猩猩能言取其血可以染朱罽後魏酈道元水經注云武平郡封谿縣有獸名猩猩猿形人面身毛黃姿顏端正善學人語聞者無不酸楚太原王綱著傳云阮研曾使封溪見邑人說猩猩好酒及屐里人置之山谷常行路數百爲羣見酒物等知人設張取之此獸甚靈先知其人祖父姓名而詈曰奴欲殺我捨爾去也旣去復還因相呼曰試共嘗酒及飲乃甘其味逮半醉皆擒之無遺逸遂至檻中隨其所欲飼之將烹索其肥者乃自推

擇泣而遣之廣志云猩猩唯聞其啼不聞其言出交
趾郡封溪縣按前代永昌郡卽今之雲南郡武平郡
卽今之安南府並封略之內古謂其靈而智不因人
教而解人語殊爲珍異秦漢以降天下一家卽嶺南
獻能言鳥及馴象西域獻汗血馬皆載之史傳以爲
奇物復廣異聞聲教遠覃如越裳白雉之類故彰示
後代則猩猩不異於鳥象何爲獨無獻乎獲之以充
口實則致之固難也王莽置漢孺子於四壁中禁人
與語及長不能名六畜猩猩若非靈異自解人語卽
須因教方成又不可容易而爲庖膳也是知諸家所
說不加考覈遞相祖述耳佑以爲廣志尤足徵矣血

染朱罽徧問胡商元無此事故詳而疏之秋濤按爾
雅但云猩猩如小兒啼不云其能言蓋舉其初而言
之郭義恭杜君卿之論是也王會所紀能言則人教
之言既能言方以充貢如鸚鵡鸛鵒秦吉了之類非
謂其生而能言也他書神奇之說均出傳會流爲丹
青不足據依南山經招搖之山有獸狀如禺而白耳
伏行人走名曰狢狢不云能人言與爾雅同或疑別
是一物
也非至海內南經所云狢狢知人名名者相命也謂知
人言耳而後人遂謂先知其人祖父姓名近於誕矣
奇幹一作幹善芳善芳者頭若雄雞佩之令人不昧本注
一作
禮切皆東嚮

孔氏曰奇幹亦北狄善芳鳥名不昧不忘也

一本奪此五字

此東向列次也

一作皆東東向列次也

王氏補注曰山海經翼

望之山有鳥其狀如鳥三首六尾而善笑名曰鵲鵲

王氏自注音猗餘

服之使人不厭注不厭夢也周書云服者

不昧或曰昧昧目也善芳太平御覽作獻茅

秋濤曰奇幹不知所在當在西方孔氏以爲北狄非

也自夷用闢木以下至此凡五國者附近西南邊塞

以北方之國雜廁其閒斯爲乖矣今以諸書考之疑

卽奇肱國海外西經奇肱之國其人一臂三目有陰

有陽乘文馬有鳥焉兩頭赤黃色在其旁按此鳥兩

頭與下鵲鵲三首之說相近赤黃色與頭若雄雞之

說相近疑卽王會之善芳也郭注肱或作厶奇音羈
畢尙書曰舊本傳云或作宏非也說文云厶肱字淮
南子墜形訓作奇股高誘注云奇隻也股腳也奇肱
又作奇恆太平御覽七百九十七卷西戎六引括地
圖曰奇恆民善爲機巧設百禽爲飛車從風遠行湯
時西風多奇恆車至於豫州湯破其車十年西

當作東

風到乃令復作遣歸去玉門四萬里按奇恆乘西風
而至豫州又云去玉門四萬里則在西方可知楚詞
招魂云去君之恆幹注恆常也幹體也奇幹猶言奇
體卽奇肱之謂也肱與恆則聲近借字耳又案西山
經所載翼望山之鵠鷁鳥郭注引周書服者不昧似

郭所見王會本與山經鳥名相同故直引爲說也畢
注釋鵠鵠曰王會奇幹善芳云云孔晁曰奇幹亦北
狄善芳鳥名按此鳥與此略同疑奇幹卽鵠鵠鳥字
或當爲奇幹周書云善芳當爲善笑形相近字之譌
孔說非也又釋不厭曰倉頡篇云厭眠內不祥也俗
作魘非高誘注淮南子曰楚人謂厭爲昧則卽周書
云不昧也秋濤按畢注以鵠鵠卽善芳其所出之山
名翼望翼望在今甘肅西南徼外青海之地西山經云凡西
次三經之首自崇吾之山至于翼望之山畢注曰此
經之山皆在甘肅今以地勢推之則翼望山當在徼
外青海正西方也畢注之說似亦近是又按北山經
帶山有鳥焉其狀如鳥五采而赤文名曰鵠鵠是自

爲牝牡食之不疽郭注曰上已有此鳥疑同名畢注
曰陸德明莊子音義引此作奇類以釋類自爲雌雄
則當爲奇類也按畢以翼望之鵠鵠當爲奇幹帶山
之鵠鵠當爲奇類郝蘭皋以爲非是竊意鳥名鵠鵠
當不誤或王會之幹字當爲余傳寫有譌未可知也
自義渠以下至此國皆在西方故列於西而東嚮
北方臺正東高夷嘽羊嘽羊者羊而四角

孔氏曰高夷東北夷高句驪王氏補注曰爾雅疏九
夷三曰高驪東夷傳高句驪在遼東之東千里南與
朝鮮歲貊東與沃沮北與夫餘接

王氏自注東夷相傳以爲夫餘別種

故言語法則多同

述異記成王時東夷進六角羊亦嘽羊之

類

王氏自注
噉平監切

後漢書冉駹夷有五角羊

秋濤曰古高句驪國今朝鮮咸興府東北之高句驪

城卽其地

見一統志

按古朝鮮與高句驪爲二朝鮮乃箕

子所封漢書地理志樂浪郡朝鮮是也高句驪亦曰

高麗漢志玄菟郡高句驪是也後漢書高句驪在遼

東之東千里南與朝鮮濊貊東與沃沮北與扶餘接

地方二千里多大山深谷人隨而爲居相傳以爲夫

餘別種後始并爲一云又按噉與羴聲相近西山經

錢來之山有獸焉其狀如羊而馬尾名曰羴羊其脂

可以已腊郭璞註今大月氏國有大羊如驢而馬尾

爾雅曰羊六尺爲羴謂此羊也羴音羴以音求之噉

羊殆卽羴羊歟又按畢尙書云羴非古字當爲麀蓋以說文無羴字故也然攷說文麀山羊而大者細角爾雅釋獸則云熊虎醜其子狗絕有力麀按麀字从鹿而二義皆非鹿也特以其同爲四足之獸故從其偏旁耳麀羊字从鹿亦然若羴字載於山經以羊類从羊合於六書似未可議其非古也 秋濤又按自高夷以下至山戎凡七國皆東北方之國也故列於北方臺正東自般吾以下至匈奴凡七國皆西北方之國也故列於其西其西云者謂北方臺正西也王會第舉其朝位卽因以見其國之方位古人文簡義該類如此

獨鹿叩叩

秋濤按各本此下有距虛善走也五字係衍

文當刪按下文孤竹距虛孔注云距虛野獸

驢之屬

如此文已有距虛則孔當注于此下不當注

于孤竹下也況此五字又不成文其為涉注誤衍無疑

孔氏曰獨鹿西方之戎也叩叩獸似鼠

一無鼠距虛字是也

負歷而走也

秋濤按孔注原文當作獸似距虛負歷而走也叩叩狀如馬距虛驢驘之屬是

二獸形本相似故孔云然淺人因正文誤衍距虛善走也五字遂謬增鼠字使若分釋二獸者然不知其

抵牾不合也爾雅翼不能校正其引孔注又刪王氏去蚤字是誤而更誤乃議孔氏之非可謂慎矣

補注曰周書史記篇阪泉氏徙立至于獨鹿注西戎

地名爾雅西方有比肩獸焉與叩叩距虛比為叩叩

距虛齧甘草即有難叩叩距虛負而走其名謂之歷

注呂氏春秋曰北方有獸其名為歷鼠前而免後趨

則頓走則顛然則唧唧距虛亦宜鼠後而兔前前高

不能取甘草故須蟹食之今鴈門廣武縣夏屋山中

有獸形如兔而大相負共行土俗謂之蟹鼠王氏自注音厥

穆天子傳唧唧距虛日走五百里符瑞志比肩獸王

者德及矜寡則至說文作蚤蚤王氏自注爾雅翼云

境慶州之地大漠中有跳兔形皆兔也但前足纔寸許後則幾一尺行則用後足跳一躍數尺止則蹶然

仆地此則蚤也唧唧距虛蓋二獸子虛賦曰楚蚤而

小說距虛孔子曰蚤蚤距虛見人將來必負蟹以走二

獸者非性愛蚤也為得甘草而貴之故也然則負蟹

者或唧唧或距虛二物不相須也周書王會注以為

唧唧似鼠距虛負而走則是以唧唧為蟹也與爾雅

說苑異今不取秋濤按爾雅

翼所引孔注舛誤辨已見前

秋濤曰王懷祖先生讀書雜誌曰上下文六國皆東

北夷則獨鹿亦東北夷非西方之戎也獨與涿古聲相近獨鹿卽涿鹿也漢書武帝紀行幸厯獨鹿鳴澤服虔曰獨鹿山名在涿郡史記五帝紀黃帝與蚩尤戰於涿鹿之野集解亦引服虔曰涿鹿山名在涿郡索隱曰按地理志上谷有涿鹿縣則服虔云在涿郡者誤也是獨鹿卽涿鹿其地在今直隸宣化府保安州南非西方之戎明矣秋濤按孔氏以獨鹿在西方他無所據特因爾雅載西方有比肩獸與邛邛距虛比故並獨鹿而目爲西方之戎耳懷祖先生獨辨其非所見甚卓故備錄之又按史記解之獨鹿與阪泉氏相近亦獨鹿在東北之證也海外北經北海內有素獸焉狀如馬名曰蛩蛩郭

注云卽蛩蛩距虛也一走百里見穆天子傳此亦北方有叩叩之一證

孤竹距虛

孔氏曰孤竹東北夷

一作狄

距虛野獸

一無此二字

驢騾之

屬王氏補注曰爾雅觚竹在北方地理志遼西令支有孤竹城括地志孤竹故城在平州盧龍縣南十二里殷時諸侯國姓墨胎氏史記正義孤竹君是殷湯正月三日丙寅封相傳至夷齊之父山海經北海有素獸狀如馬名曰蛩蛩注蛩蛩距虛也一走百里穆天子傳距虛注亦馬屬尸子曰距虛不擇地而遠玉篇駉驢獸似騾

秋濤曰孤竹城在今直隸永平府盧龍縣南漢書地

理志令支縣有孤竹城令支地詳不令支下水經注玄水西南

逕孤竹故城北孤竹國也城在山側肥如縣南十二

里一統志曰按水經注孤竹城在濡口之東玄水之

南舊志謂在縣西十五里轉在灤河之西灤河即古濡水蓋

後人所附會也秋濤按爾雅列觚竹於四荒觚孤音

同古字通用郭璞注觚竹在北今按孤竹實在東北

惟對北戶爲南荒言之則孤竹正可云北荒耳齊語

紀桓公事云北伐山戎剗令支斬孤竹韋昭注二國

山戎之與也又按邛邛距虛或以爲一獸或以爲二

獸爾雅釋文引李巡云邛邛距虛能走蟹知美草卽

若驚難者卽卽岨虛便負蟹而走故曰比肩獸孫炎云卽卽岨虛狀如馬前足鹿後足兔前高不得食而善走蟹前足鼠後足兔善求食走則倒故齧甘草則仰食卽卽岨虛卽卽岨虛負以走是皆以卽卽岨虛爲一獸子虛賦有麟卽卽楚距虛之文郭璞注云距虛卽蛩蛩賦家變文互言耳顏師古從其說邵氏晉涵作爾雅正義本之頗以言二物者爲非按說苑載孔子之言明分卽距爲二獸漢書子虛賦張揖注云蛩蛩青獸狀如馬距虛似羸而小是其形狀迥殊山海經說文皆以蛩蛩爲獸不言距虛枚乘七發云後類距虛李善注引范子云千里馬必有距虛合之尸

子廣雅玉篇諸書皆專舉距虛不言叩叩又上林賦
蛩蛩驪驤郭璞注云驪驤駉驢類也崔豹曰驢爲牡
馬爲牝卽生驪馬爲牡驢爲牝生駉驢是距虛與叩
叩大異不可強同郝氏懿行作爾雅義疏驢舉各家
以言二物者爲是可備定論王會分列二國所貢孔
注亦剖晰極明足爲爾雅訂此疑義矣

不令支玄獫

秋濤按一本
獫作模譌也

孔氏曰不令支皆東北夷

秋濤按皆字衍

獫白狐

秋濤按一
無此三字

非玄獫則黑狐

秋濤按二狐字皆
豹字之譌說見後

王氏補注曰齊語

北伐山戎刺令支

王氏自注
史記離枝

斬孤竹注二國山戎之

與也令支今爲縣屬遼西孤竹之城存焉括地志令

支故城在平州盧龍縣西七十里

王氏自注爾雅獬

白豹注似熊小頭庫腳黑白駁能舐食銅鐵及竹骨

骨節強直中實少髓皮辟溼或曰豹白色者別名獬

說文似熊而黃黑色出蜀中

王氏自注莫白切

南中志曰獬

大如驪狀頗似熊多力食鐵所觸無不拉廣志曰獬

色蒼白其皮溫煖

秋濤按韵會曰獬通作獬後漢書西南夷傳曰哀牢夷出獬獸注引

南中志廣志卽王氏所本也

秋濤曰此令支及下屠何皆東北國名謂之不令支

不屠何者猶吳之稱句吳越之稱於越也蓋其國之

人自稱有此發語聲故因而記之爾雅不律謂之筆

郭注曰蜀人呼筆爲不律也語之變轉王伯申尙書

以爲不者發聲猶滑謂之不滑類謂之不類若謂之不若也不律謂之筆猶言律謂之筆耳按此解不字極確可與王會不字相證明也又按令支故城在今直隸永平府遷安縣西古令支國春秋時爲山戎屬國家語記齊桓公北伐山戎制令支管子作泠支音同字異史記齊世家桓公北伐山戎離支孤竹方以智通雅曰離支卽令支也離令音近令音零按漢於令支故國置縣至晉初入於鮮卑大安二年封鮮卑務勿塵爲遼西公以令支爲國都其後慕容儁取令支置遼西郡義熙三年慕容懿以令支降魏魏眞君七年併令支入陽樂縣魏書地形志肥如縣有令支

城通典盧龍有漢令支縣城遼史地理志平州安喜
縣本漢令支縣地金史地理志平州遷安縣本漢令
支縣故城遼置安喜縣大定七年更今名遷安縣志
安喜故城在縣西北七十里永平府志安喜故城在
今縣東北二十里未詳孰是又按獾與貉同孔注今
本云獾白狐係傳寫之誤攷爾雅白狐乃貉非獾也
爾雅獾白豹郭注有二說前說謂獸似熊黑白駁能
舐食銅鐵後說則謂豹白色者別名獾王伯申尙書
曰上文虎竊毛謂之虬貓下文虬白虎虬黑虎皆言
虎豹之屬非言熊屬也豹與熊殊類似熊者不得謂
之豹當以後說爲長說文豹似虎圖文詩大雅正義

引陸璣疏曰毛赤而文黑謂之赤豹毛白而文黑謂之白豹獏蓋毛白而文黑者獏之爲言猶白也似熊而黑白駁之獏與白豹之獏皆以白得名而一爲白豹一爲食銅鐵之獸不得混爲一物王會篇孔注曰獏白豹玄獏則黑豹今本豹字皆誤作狐玉海引此已誤列子天瑞篇青寧生程程生馬釋文引尸子云程中國謂之豹越人謂之獏又引山海經云南山多獏豹郭注云獏是豹之白者今本西山經獏豹作猛毛淺有光澤能飢食銅鐵出蜀中與列子釋文所引不同蓋獏有二義故郭注兩釋之而後人遂刪其一也然正文旣言獏豹則是白豹之別名而非食此皆銅鐵之獸矣獏猛古字通猶虺蚺之爲虺猛此皆爾雅所謂獏也說文獏似熊而黃黑色出蜀中未嘗

以爲爾雅之白豹字林獬似熊而白黃出蜀郡一曰
白豹然則似熊而白黃者非白豹明矣

不屠何青熊

秋濤案熊一本作能

孔氏曰不屠何亦東北夷也王氏補注曰管子曰桓
公敗胡貉破屠何注屠何東胡之先也說文熊似豕
山居冬蟄上林賦注犬身人足王氏自注禹貢梁州貢熊羆詩言韓土有

熊有羆

秋濤曰按屠何卽徒河故城在今奉天錦州府錦縣
西北相傳虞舜時已有此城劉恕通鑑外紀周惠王
三十三年齊桓公救燕破屠何卽徒河也桓公用兵
後地蓋屬燕漢置徒河縣屬遼西郡後漢安帝時改

屬遼東屬國都尉魏晉省入昌黎郡界後慕容氏復置徒河縣太康十年慕容廆遷于徒河之青山元康四年移居棘城魏書地形志眞君八年併徒河屬廣興縣杜佑通典曰徒河青山在營州郡城東一百九十里明一統志徒河故城在廣寧中屯衛境內卽此城也又今之錦州府寧遠州亦漢徒河縣地以屠何爲不屠何者義已見前云青熊者熊羆同類之物今山中熊類不一有人熊蓋卽羆也有猪熊馬熊之屬皆因其形之近似而命名猪熊色黑其卽所謂青熊歟

東胡黃羆

孔氏曰東胡東北夷也

一本奪此注

王氏補注曰伊尹朝

獻商書正北東胡山海經大澤在雁門北東胡在大
澤東匈奴傳燕北有東胡服虔曰烏桓之先也後爲
鮮卑爾雅羆如熊黃白文似熊而長頭高腳猛憨多
力能拔樹木關西呼曰貊羆詩韓侯其追其貊奄受
北國獻其黃羆陸璣疏羆大於熊淮南子散宜生得
玄豹黃羆以獻於紂

秋濤曰史記匈奴傳

互見漢書

燕北有東胡山戎索隱曰

服虔云東胡烏丸之先後爲鮮卑在匈奴東故曰東
胡史記又曰其後燕有賢將秦開襲破東胡東胡卻
千餘里燕築長城自造陽

韋昭曰地名在上谷正至義曰案上谷郡今媯州

襄平

索隱曰韋昭云今遼東所理

置上谷漁陽右北平遼西遼東

郡以拒胡熱河志曰按後漢書郡國志令支縣有孤竹城令支及孤竹今盧龍縣遷安縣地自此以東北皆山戎境齊師至此而山戎遁走故遂自孤竹而還今永平府北邊外卽承德府屬之東南境知爲春秋時山戎地也東胡與匈奴接壤當在山戎西今順天府北邊外卽承德府屬之西南境知爲春秋時東胡地也服虔以山戎爲漢鮮卑以東胡爲漢烏桓而於東胡又云後爲鮮卑後漢書則以烏桓鮮卑並爲東胡之支山戎則戰國時已無聞蓋爲東胡强盛所併是承德府全境在春秋末又當全爲東胡地也續漢

書曰

見索隱所引

漢初匈奴冒頓滅其國餘類保烏桓山

以爲號俗隨水草居無常處以後事迹詳後漢書烏桓鮮卑傳廣韻引前燕錄云昔高辛氏游於海濱留少子厭越以居北夷邑于紫蒙之野號曰東胡云云其後爲慕容氏又按海內西經云大澤方百里羣鳥所生及所解在雁門北史記索隱曰崔浩云翰海北海名羣鳥之所解羽故云翰海郭注大澤曰百鳥於此生乳解之毛羽畢尙書曰案此澤名翰海亦卽委羽之山皆以解羽名之秋濤按此翰海據崔說卽羽翰之翰今俗加水作瀚非是翰海卽今沙漠東胡在其東也邵氏晉涵爾雅正義曰熊爲熊類而力大於

熊有赤黃二種而古者以黃爲貴

詩大雅稱韓侯及淮南子道應訓記

散宜生與王會所紀諸國貢禹貢以熊羆狐狸爲梁

州之貢是貢羆之始也又曰羆與熊相似古人多連

舉淮南說山訓云熊羆之動以攫搏高誘注云熊羆

多力故能攫搏今獵者不知有羆而分熊爲三種曰

猪熊曰馬熊曰人熊柳宗元謂鹿畏羆羆畏虎虎畏

羆羆之狀被髮人立而甚害人是以人熊爲羆矣郝

氏懿行曰爾雅翼云羆卽熊之雌者其說非也熊羆

各有牝牡今關東人說人熊之狀正與柳合蓋熊羆

同類俗人不識羆故呼爲人熊耳

山戎戎菽

一本奪下戎字

孔氏曰山戎亦東北夷戎菽巨豆也

一作豆藥非是王氏補

注曰匈奴傳燕北有山戎山戎越燕而伐齊史記正義今奚國杜預曰山戎北狄無終三名一也括地志幽州漁陽縣本山戎無終子國漢書戎叔注胡豆也管子桓公北伐山戎以戎菽遍布於天下

秋濤曰今直隸承德府所屬之平泉赤峯建昌朝陽等州縣在周時皆山戎地後併入東胡又永平府之西境亦山戎故壤春秋時謂之北戎左傳隱九年北戎侵鄭桓公六年北戎伐齊莊三十年齊人伐山戎以其病燕故管子及國語載桓公北伐甚詳皆是時事也合孤竹令支屠何諸國皆爲山戎所役屬其強可

知是歲齊侯獻戎捷于魯蓋以摧破強敵故張大其事耳僖十年齊侯許男伐北戎自是後北戎不見於傳襄四年無終子嘉父因魏莊子納虎豹之皮以請和諸戎杜注無終山戎國名昭元年晉荀吳敗無終及羣狄于太原正義曰計無終在太原東北二千餘里不知何故遠就太原來與晉戰秋濤按無終蓋諸戎之長故能率以請和又能遠至太原不足異也今順天府玉田縣西有無終城卽無終故國又按戎菽卽大豆又名荏菽聲轉而爲戎菽大雅生民云蓺之荏菽毛傳用爾雅云荏菽戎菽也鄭箋云戎菽大豆也正義云釋草云戎菽謂之荏菽孫炎曰大豆也此

箋亦以爲大豆樊光舍人李巡郭璞皆云今以爲胡
豆郭璞又云春秋齊侯來獻戎捷穀梁傳曰軍得曰
捷戎菽也管子亦云北伐山戎出冬蔥及戎菽布之
天下今之胡豆是也王懷祖先生曰案爾雅戎菽皆
爲大豆注穀梁者亦以爲大豆也郭璞等以戎菽爲
胡豆卽如郭言齊桓之伐山戎始布其豆種則后稷
之所種者何時絕其種乎而齊桓復布之禮有戎車
不可謂之胡車明戎菽正大豆是也九穀考云爾雅
釋詁王戎皆訓爲大王與荏字可通荏菽戎菽大豆
之稱也管子書戎菽或別是一種非后稷之所樹者
今按王會所紀協之穀梁管子則戎菽亦如巨勝胡

麻之比正未可執一以相疑矣又按羣芳譜云豌豆種出山戎北土尤多百穀之中最爲先熟張揖廣雅分胡豆豌豆爲二本草辨其非是以爲戎菽與胡豆卽今之豌豆也按穀梁戎菽楊士勛疏引徐邈曰今之胡豆管子戎菽注亦云胡豆熱河志曰羣芳譜載豆之屬以大小二豆該之豌豆在小豆之中以其種出山戎而今熱河卽古山戎之地故特著之秋濤按蠶豆亦一名胡豆與豌豆同時種而形性迥別其大倍于豌豆農政全書云蠶豆之利比于豌豆十倍或桓公所得卽此物以其異常而布之天下歟

王會篇箋釋卷中終

錢塘諸可寶覆勘
新陽汪之昌分校